

## **Tema Bulan Bahasa 2012**

### **Kukuhnya Nilai Eloklah Budi. Bahasa Kita. Gunakanlah**

#### **Tema Nilai dan Budi – Latar belakang**

Bulan bahasa 2012 memberikan fokus kepada aspek nilai dan budi yang dapat diserap dengan kerapnya penggunaan bahasa Melayu yang bersantun, sesuai dengan ciri-ciri masyarakat Melayu yang mengutamakan adab ketika berbahasa.

Dengan amalan berbudi ketika berbahasa, kita akan mengambil kira perkataan yang kita pilih, cara menyampaikan maksud dengan tata tertib yang diterima oleh masyarakat Melayu khususnya dan masyarakat lain, amnya.

#### **Kukuhnya Nilai**

Nilai ialah ciri-ciri yang menjadi landasan tindakan dalam kehidupan kita. Setiap kelakuan atau tindakan kita dilakukan berdasarkan nilai yang kita yakini atau percaya. Kukuhnya Nilai merujuk kepada yakinnya seseorang itu kepada nilai-nilai murni, iaitu nilai yang positif atau yang baik. Dengan kukuhnya keyakinan seseorang itu dengan nilai-nilai murni seperti baik hati, berhemah tinggi, hormat-menghormati, kasih sayang, keadilan, kejujuran, kerjasama, semangat bermasyarakat dan sebagainya, segala tindakannya akan bersandarkan nilai-nilai murni tersebut.

#### **Eloklah Budi**

Budi pula ialah perilaku yang baik. Adat Melayu menganjurkan kita berbudi (berkelakuan baik) tidak kira masa dan tempat dan kepada sesiapa sekalipun. Oleh itu, budi yang elok atau yang baik menunjukkan seseorang itu mempunyai budi pekerti dan berhemah tinggi dalam tindakan mereka dengan keluarga, rakan dan masyarakat sekeliling mereka.

#### **Kukuhnya Nilai Eloklah Budi. Bahasa Kita. Gunakanlah**

Nilai, Budi dan Bahasa merupakan elemen yang amat mesra bagi isi dengan kuku. Slogan Kukuhnya Nilai Eloklah Budi. Bahasa Kita. Gunakanlah mengajak masyarakat menggunakan bahasa Melayu sekerap yang boleh dalam setiap ruang dan peluang yang ada agar terpancar dan terserlah nilai murni dan budi bahasa masyarakat Melayu yang teranyam dalam bahasa.